

**ASEAN perlu tarik pelabur
Utusan Online
11 April, 2012
Oleh AZMAN IBRAHIM**

KUALA LUMPUR 10 April – ASEAN perlu bekerjasama dan membentuk blok bersepadu bagi menarik para pelabur asing supaya melihat peluang kepada destinasi baharu di kalangan negara anggota, kata Editor Oxford Business Group (OBG) Regional for Asia, Paulius Kuncinas.

OBG merupakan penerbitan global serta firma perundingan dan penyelidikan ekonomi.

Kuncinas berkata, ia merupakan masa yang tepat untuk ASEAN memberi isyarat kepada para pelabur asing yang akan beralih arah dari pasaran Amerika Syarikat (AS) dan Eropah ke negara-negara baharu muncul seperti Brazil, Rusia, India dan China (BRIC).

Jelasnya, negara-negara ASEAN juga perlu menunjukkan bahawa mereka saling memerlukan dan bekerjasama antara satu sama lain berbanding mewujudkan persaingan.

Beliau memberitahu, kesepakatan itu amat penting bagi menolak tanggapan negatif pelabur terhadap negara-negara ASEAN yang tidak menarik, kurang kesepaduan serantau dalam koordinasi dasar infrastruktur.

"Saya fikir ASEAN tidak 'menjual' negara-negara yang berpotensi di peringkat antarabangsa dan ia berisiko untuk kehilangan peluang terhadap negara-negara baharu muncul yang lain," ujar Kuncinas.

Tambah Kuncinas, pihaknya dapat melihat masalah yang terdapat di kalangan negara ASEAN melalui Sidang Kemuncak ASEAN kali ke-20 di Phnom Penh, Kemboja.

Katanya, masalah negara-negara ASEAN adalah tidak dihubungkan dengan dunia luar secara baik.

Kuncinas memberitahu lagi, selain bercita-cita besar untuk menyatukan ASEAN di peringkat antarabangsa, ia juga dijangka menjadi proksi kepada pasaran besar Indonesia untuk melebarkan pasaran ke peringkat antarabangsa.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0411&pub=Utusan_Malaysia&sec=Ekonomi&pg=ek_01.htm